

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৪৬/২০১৭-১৮

ঢাকা, রোববার ১০ সেপ্টেম্বর ২০১৭, ২৬ ভদ্র ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। জাতীয় সংসদের সপ্তদশ অধিবেশন বসছে আজ
- ২। ওআইসি সম্মেলনে যোগ দিতে কাজাখস্তান পৌঁছেছেন রাষ্ট্রপতি
- ৩। আজ কুয়াকাটায় দ্বিতীয় সাবমেরিন ক্যাবলের উদ্বোধন করবেন প্রধানমন্ত্রী
- ৪। আজ নতুন বিদ্যুৎকেন্দ্রের উদ্বোধন করবেন প্রধানমন্ত্রী
- ৫। পালিয়ে আসা রোহিঙ্গাদের জন্য ২৫০০ একর জমির ব্যবস্থা করা হচ্ছে : ত্রাণমন্ত্রী
- ৬। রোহিঙ্গা ইস্যুতে বাংলাদেশ একা নয় : মালয়েশিয়ার প্রধানমন্ত্রী
- ৭। ফজিলাতুল্লাহ মুজিব হাসপাতালে স্বাস্থ্য পরীক্ষা করালেন প্রধানমন্ত্রী
- ৮। স্বাস্থ্যখাতে বাংলাদেশের সাফল্যের প্রশংসায় বিশ্ব স্বাস্থ্য সংস্থা
- ৯। দোহাজারী-কক্সবাজার রেললাইন সম্প্রসারণ এ মাসেই শুরু : রেলমন্ত্রী
- ১০। বাংলাদেশে বিনিয়োগে আগ্রহী সিঙ্গাপুর ও শ্রীলংকার ব্যাংক

১। **জাতীয় সংসদের সপ্তদশ অধিবেশন বসছে আজ**

জাতীয় সংসদের সপ্তদশ অধিবেশন আজ (১০ সেপ্টেম্বর রোববার) বিকাল ৫ টায় শুরু হবে। এটি হবে সংসদের শরৎকালীন অধিবেশন। সংসদ সচিবালয় সূত্র জানায়, এ অধিবেশনের মেয়াদ এক সপ্তাহ থেকে ১০ দিন হতে পারে। সূত্র-ইত্তেফাক (শেষ পৃ.,ক.৮), সংবাদ (শেষ পৃ.,ক.৫), ডেইলি সান (পৃ.১,ক.১), নিউজ টুডে (পৃ.১,ক.৫)।

২। **ওআইসি সম্মেলনে যোগ দিতে কাজাখস্তান পৌঁছেছেন রাষ্ট্রপতি**

ইসলামী দেশগুলোর শীর্ষ সংগঠন ওআইসি'র প্রথম বিজ্ঞান ও প্রযুক্তি বিষয়ক সম্মেলনে যোগ দিতে কাজাখস্তানের রাজধানী আস্তানায় পৌঁছেছেন রাষ্ট্রপতি মো. আবদুল হামিদ। গতকাল (৯ সেপ্টেম্বর শনিবার) স্থানীয় সময় রাত ৮টা ২৫ মিনিটে রাষ্ট্রপতিকে বহনকারী বাংলাদেশ বিমানের ভিভিআইপি ফ্লাইটটি আস্তানার নূর সুলতান নাজারবায়েভ আন্তর্জাতিক বিমানবন্দরে পৌঁছায়। বিমানবন্দরে রাষ্ট্রপতিকে অভ্যর্থনা জানান কাজাখস্তানের বিচারমন্ত্রী মারাত বেকেতায়েভ এবং আস্তানার ফার্স্ট ডেপুটি মেয়র সেরজি মিখাইলোভিচ। কাজাখস্তানে বাংলাদেশের দায়িত্বপ্রাপ্ত রাষ্ট্রদূত মসুদ মান্নানও এ সময় উপস্থিত ছিলেন। এর আগে গতকাল (৯ সেপ্টেম্বর শনিবার) বাংলাদেশ বিমানের একটি ভিভিআইপি ফ্লাইটে রাষ্ট্রপতি আস্তানার উদ্দেশে রওনা হন। সূত্র-জনকণ্ঠ (শেষ পৃ.,ক.৫), সংবাদ (পৃ.২,ক.৭), ডেইলি সান (পৃ.৩,ক.৪), ইন্ডিপেনডেন্ট (পৃ.৩,ক.১)।

৩। **আজ কুয়াকাটায় দ্বিতীয় সাবমেরিন ক্যাবলের উদ্বোধন করবেন প্রধানমন্ত্রী**

কুয়াকাটায় বহুল প্রতীক্ষিত দেশের দ্বিতীয় সাবমেরিন ক্যাবল উদ্বোধনের মধ্য দিয়ে তথ্য প্রযুক্তির অগ্রযাত্রায় এগিয়ে যাচ্ছে বাংলাদেশ। আজ (১০ সেপ্টেম্বর রোববার) সকাল ১০টায় প্রধানমন্ত্রী শেখ হাসিনা গণভবন থেকে ভিডিও কনফারেন্সের মাধ্যমে সাবমেরিন ক্যাবল 'সি-মি-উই-৫' উদ্বোধন করবেন। একইসময়ে প্রধানমন্ত্রী কলাপাড়ার টিয়াখালী নদীর উপরে নির্মিত টিয়াখালী-লোন্দা সেতু এবং নবনির্মিত রাজাবালী উপজেলা পরিষদ ভবনের আনুষ্ঠানিক উদ্বোধন করবেন। এছাড়াও তিনি কলাপাড়া উপজেলা পরিষদের বর্ধিত ভবনের নির্মাণ কাজের ভিত্তিপ্রস্তর স্থাপন করবেন বলে আশা প্রকাশ করা হচ্ছে। সূত্র-জনকণ্ঠ (শেষ পৃ.,ক.৬), ইনকিলাব (পৃ.১,ক.৭), যুগান্তর (পৃ.২,ক.১)।

৪। **আজ নতুন বিদ্যুৎকেন্দ্রের উদ্বোধন করবেন প্রধানমন্ত্রী**

দেশের আরো ১০টি উপজেলা শতভাগ বিদ্যুৎসেবার আওতায় আসছে। এ নিয়ে মোট ২৬টি উপজেলা শতভাগ বিদ্যুৎসুবিধার আওতায় আসলো। এছাড়া যাত্রা শুরু করছে নতুন দুইটি কেন্দ্র। ভারতের ত্রিপুরা থেকে ৬০ মেগাওয়াট বিদ্যুৎ আমদানি করা হচ্ছে। বিদ্যুৎ বিভাগ সূত্র জানায়, আজ (১০ সেপ্টেম্বর রোববার) প্রধানমন্ত্রী শেখ হাসিনা নতুন কেন্দ্র, শতভাগ উপজেলা বিদ্যুতায়ন এবং বিদ্যুৎ আমদানির আনুষ্ঠানিক উদ্বোধন করবেন। আজ সকাল ১০টায় গণভবন থেকে ভিডিও কনফারেন্সের মাধ্যমে এ উদ্বোধন করা হবে। এদিকে ব্রাহ্মণবাড়িয়ার আশুগঞ্জ ৪৫০ মেগাওয়াট এবং ঢাকার বসিলায় ১০০ মেগাওয়াট বিদ্যুৎকেন্দ্রের উদ্বোধন করবেন প্রধানমন্ত্রী। সূত্র-ইত্তেফাক (পৃ.৩,ক.৫), সংবাদ (পৃ.১,ক.৫)।

৫। **পালিয়ে আসা রোহিঙ্গাদের জন্য ২৫০০ একর জমির ব্যবস্থা করা হচ্ছে : ত্রাণমন্ত্রী**

মায়ানমার থেকে পালিয়ে আসা রোহিঙ্গাদের জন্য আড়াই হাজার একর জমির ব্যবস্থা করা হচ্ছে বলে জানিয়েছেন দুর্যোগ ব্যবস্থাপনা ও ত্রাণমন্ত্রী মোফাজ্জল হোসেন চৌধুরী। গতকাল (৯ সেপ্টেম্বর শনিবার) কক্সবাজারের টেকনাফে নোয়াপাড়া রোহিঙ্গা শরণার্থী শিবির পরিদর্শন শেষে সাংবাদিকদের এ কথা বলেন তিনি। মন্ত্রী বলেন, প্রধানমন্ত্রী শেখ হাসিনার নির্দেশে মানবিক দৃষ্টিকোণ থেকে রোহিঙ্গাদের আশ্রয় দেওয়া হয়েছে। অতি অল্প সময়ের মধ্যে রোহিঙ্গা সমস্যার সমাধান করার জন্য মিয়ানমারের ওপর আন্তর্জাতিকভাবে চাপ প্রয়োগ করা হচ্ছে। সূত্র-প্রথম আলো (পৃ.২,ক.৪), সমকাল (পৃ.৩,ক.৫), বাংলাদেশ টুডে (পৃ.১,ক.২)।

৬। **রোহিঙ্গা ইস্যুতে বাংলাদেশ একা নয় : মালয়েশিয়ার প্রধানমন্ত্রী**

মালয়েশিয়ার প্রধানমন্ত্রী নাজিব রাজাক বলেছেন, রোহিঙ্গা ইস্যুতে বাংলাদেশ একা নয়, নতুন করে আশ্রয় নেওয়া রোহিঙ্গাদের প্রয়োজনীয় সহায়তা দিতে বাংলাদেশ সরকারের পাশে রয়েছে মালয়েশিয়া। ইতোমধ্যে রোহিঙ্গাদের সহায়তার জন্য মালয়েশিয়ার সরকার ১২টন ত্রাণ পাঠিয়েছে যা চট্টগ্রাম এসে পৌঁছেছে। এছাড়া একটি প্রতিনিধিদল আগামীকাল (১১ সেপ্টেম্বর সোমবার) ঢাকায় পাঠাচ্ছে মালয়েশিয়া।

=৩=

রোহিঙ্গাদের সহায়তায় আরো কি পদক্ষেপ নেওয়া যায়, সে বিষয়ে বাংলাদেশ সরকারের সঙ্গে ঐ টিম আলোচনা করবে বলে মালয়েশিয়ার সংবাদ সংস্থা বারনামার এক খবরে বলা হয়েছে। নাজিব রাজাক আরো জানান, আগামী ১২ সেপ্টেম্বর মঙ্গলবার মার্কিন প্রেসিডেন্ট ডোনাল্ড ট্রাম্পের সঙ্গে আলোচনায় রোহিঙ্গাদের মানবিক বিপর্যয়ের বিষয়টি তিনি উত্থাপন করবেন। সূত্র-ইত্তেফাক (পৃ.১৯,ক.৭), ডেইলি সান (শেষ পৃ.,ক.১), নিউ নেশন (পৃ.১,ক.৬), নিউজ টুডে (পৃ.১,ক.৬)।

#### ৭। ফজিলাতুল্লেছা মুজিব হাসপাতালে স্বাস্থ্য পরীক্ষা করালেন প্রধানমন্ত্রী

গাজীপুরের কাশিমপুর তেঁতুলবাড়ি এলাকায় স্থাপিত শেখ ফজিলাতুল্লেছা মুজিব মেমোরিয়াল কেপিজে বিশেষায়িত হাসপাতালে আবারও স্বাস্থ্য পরীক্ষা করালেন প্রধানমন্ত্রী শেখ হাসিনা। এ সময় তাঁর সঙ্গে ছিলেন ছোট বোন শেখ রেহানা। গতকাল (৯ সেপ্টেম্বর শনিবার) মায়ের নামে প্রতিষ্ঠিত আন্তর্জাতিক মানের অত্যাধুনিক এ হাসপাতালে স্বাস্থ্য পরীক্ষার জন্য যান তাঁরা। গত বছরের ৪ নভেম্বরও এ হাসপাতালে প্রধানমন্ত্রী শেখ হাসিনা স্বাস্থ্য পরীক্ষা করান। এবারও তিনি নিজে হাসপাতালের কাউন্টারে গিয়ে স্বাস্থ্য চেকআপের জন্য রেজিস্ট্রেশন করান ও নির্ধারিত ফি পরিশোধ করে নিয়মিত কয়েকটি স্বাস্থ্য পরীক্ষা করান। সূত্র-সমকাল (পৃ.২,ক.১), ইত্তেফাক (পৃ.১,ক.৮), অবজারভার (পৃ.২,ক.১)।

#### ৮। স্বাস্থ্যখাতে বাংলাদেশের সাফল্যের প্রশংসায় বিশ্ব স্বাস্থ্য সংস্থা

সংক্রামক ব্যাধি নিয়ন্ত্রণ, প্রাথমিক স্বাস্থ্য পরিচর্যা, প্রাকৃতিক দুর্যোগকালীন জরুরি স্বাস্থ্য পরিস্থিতি মোকাবিলাসহ স্বাস্থ্যখাতে বাংলাদেশের অভাবনীয় সাফল্যের প্রশংসা করেছে বিশ্ব স্বাস্থ্য সংস্থা (ডব্লিউএইচও)। দ্বীপ রাষ্ট্র মালদ্বীপে চলমান বিশ্ব স্বাস্থ্য সংস্থার দক্ষিণ-পূর্ব এশিয়া অঞ্চলের ৫ দিনব্যাপী বার্ষিক সম্মেলনে ডব্লিউএইচও'র মহাসচিব ড. ট্রেডস আধানম ঘেব্রিয়েসাস এ প্রশংসা করেন। গত ৬ সেপ্টেম্বর বুধবার থেকে এ সম্মেলন শুরু হয়েছে। চলবে ১০ সেপ্টেম্বর পর্যন্ত। স্বাস্থ্য প্রতিমন্ত্রী জাহিদ মালেক সম্মেলনে বাংলাদেশ প্রতিনিধিদলের নেতৃত্ব দিচ্ছেন। সূত্র-ইত্তেফাক (পৃ.১৯,ক.১), সংবাদ (শেষ পৃ.,ক.৪), নিউজ টুডে (পৃ.৩,ক.২)।

#### ৯। দোহাজারী-কক্সবাজার রেললাইন সম্প্রসারণ এ মাসেই শুরু : রেলমন্ত্রী

রেলমন্ত্রী মুজিবুল হক বলেছেন, চলতি মাসের শেষে দোহাজারী থেকে কক্সবাজারের রামু পর্যন্ত রেললাইন সম্প্রসারণের কাজ শুরু হবে। গত সপ্তাহে রেল মন্ত্রণালয়ে প্রকল্পটি পাস হয়েছে। তিনি আরো বলেন, আগামী দেড় বছরের মধ্যেই এই রেললাইন সম্প্রসারণের কাজ সম্পন্ন হয়ে যাবে। রামু-কক্সবাজার মহাসড়কের বাইপাস ফুটবল চতুরে আয়োজিত এক পথসভায় গতকাল (৯ সেপ্টেম্বর শনিবার) এ কথা বলেন রেলমন্ত্রী। রেলমন্ত্রী বলেন, রেলপথের কার্যক্রম দুই ধাপে শুরু হবে। প্রথম ধাপে দোহাজারী থেকে চকরিয়া পর্যন্ত এবং দ্বিতীয় ধাপে চকরিয়া থেকে কক্সবাজার পর্যন্ত রেললাইনের কাজ শেষ হবে। সূত্র-ইত্তেফাক (পৃ.৪,ক.৬)।

#### ১০। বাংলাদেশে বিনিয়োগে আগ্রহী সিঙ্গাপুর ও শ্রীলংকার ব্যাংক

সিঙ্গাপুর ভিত্তিক বহুজাতিক ব্যাংক ও আর্থিক সেবা প্রতিষ্ঠান দি ডেভেলপমেন্ট ব্যাংক অব সিঙ্গাপুর লিমিটেড (ডিবিএস ব্যাংক) এবং কলম্বো ভিত্তিক ন্যাশনাল ডেভেলপমেন্ট ব্যাংক অব শ্রীলংকা (এনডিবি ব্যাংক) বাংলাদেশে বিনিয়োগের আগ্রহ প্রকাশ করেছে। বাংলাদেশ বিনিয়োগ উন্নয়ন কর্তৃপক্ষের (বিডা) নির্বাহী চেয়ারম্যান কাজি মো. আমিনুল ইসলামের সাথে ডিবিএস ব্যাংকের ব্যবস্থাপনা পরিচালক সুরজিত সোম গতকাল (৯ সেপ্টেম্বর শনিবার) টেলিফোনে আলাপকালে বাংলাদেশে বিনিয়োগের ব্যাপারে গভীর আগ্রহ প্রকাশ করে বলেন,

বাংলাদেশে বিদ্যুৎ, জ্বালানি ও অবকাঠামো উন্নয়নসহ বিভিন্ন খাতে বিনিয়োগ ত্বরান্বিত করার পাশাপাশি এদেশের আর্থিক খাতে উন্নতমানের দ্রব্য ও সেবা নিয়ে আসতে চায় ব্যাংকটি। সম্প্রতি শ্রীলংকার রাজধানী কলম্বোতে অনুষ্ঠিত সার্ক ইনভেস্টমেন্ট ফোরামে ন্যাশনাল ডেভেলপমেন্ট ব্যাংক অব শ্রীলংকা গ্রুপের প্রধান নির্বাহী কর্মকর্তা দিমাছা সেরেভিরাত্তে বিডা'র চেয়ারম্যানের সাথে দেখা করে বাংলাদেশের আর্থিক খাতে উল্লেখযোগ্য আকারে বিনিয়োগের আগ্রহ প্রকাশ করেন। সূত্র-ইত্তেফাক (পৃ.১৮,ক.৫), প্রথম আলো (পৃ.১৩,ক.১)।

=8=

#### সম্পাদকীয়

- ক. **ইত্তেফাক** : স্কুল ভিত্তিক ডিজিটাল শিক্ষার দৈন্যদশা প্রকট হয়ে পড়ায় উদ্বেগ প্রকাশ করে ডিজিটাল শিক্ষা কার্যক্রমের প্রতিবন্ধকতা দূর করতে কার্যকর পদক্ষেপ নেওয়া হবে বলে প্রত্যাশা ব্যক্ত।
- খ. **সংবাদ** : সরকারি প্রাথমিক বিদ্যালয়গুলোতে প্রায় ৫৩ হাজার শিক্ষকের শূন্য পদ রয়েছে উল্লেখ করে মানসম্মত শিক্ষা নিশ্চিত করতে দ্রুত এ শূন্য পদগুলো পূরণের সুপারিশ।
- গ. **জনকণ্ঠ** : জনস্বাস্থ্যের জন্য মারাত্মক ক্ষতিকর নকল মিনারেল ওয়াটারে বাজার সয়লাব হয়ে যাওয়ায়এ ব্যাপারে কঠোর ব্যবস্থা নেওয়ার ওপর গুরুত্বারোপ।
- ঘ. **প্রথম আলো** : ফরিদপুর শহরে নির্মিত ১০তলা ভবন নির্মাণে মারাত্মক ত্রুটি চিহ্নিত হওয়ার পরও তার প্রতিকারে এখনো কোনো কার্যকর পদক্ষেপ না নেওয়ায় উদ্বেগ প্রকাশ করে সারাদেশে নির্মিত এ ধরনের ত্রুটিপূর্ণ ভবনের ব্যাপারে কঠোর পদক্ষেপ নেওয়ার ওপর গুরুত্বারোপ।
- ঙ. **যায়যায়দিন** : ঈদ উদযাপন শেষে কর্মস্থলে ফেরা মানুষ নানা দুর্ভোগে পড়ছে উল্লেখ করে এ ব্যাপারে নজরদারির সুপারিশ।
- চ. **নিউ এজ** : বন্যাকবলিত উত্তরাঞ্চলের মানুষের বন্যাপরবর্তী পুনর্বাসনে সরকারকে দৃষ্টি দেওয়ার সুপারিশ।
- ছ. **ডেইলি স্টার** : নিম্ন আদালতে বিচারক সংকট দূর করতে কার্যকর পদক্ষেপ নেওয়ার ওপর গুরুত্বারোপ করে সম্পাদকীয় প্রকাশ।

#### উপ-সম্পাদকীয়

সংবাদ পত্রিকায় প্রকাশিত কলামে উল্লেখ করা হয়েছে, আমাদের সামাজিক যোগাযোগের ক্ষেত্রে ফেসবুক এক বৈপ্লবিক পরিবর্তন এনে দিয়েছে।

#### নিবন্ধ ও ফিচার

প্রথম আলো পত্রিকায় প্রকাশিত 'বাংলাদেশকে নৈতিক অবস্থান নিতে হবে' শিরোনামের নিবন্ধে অভিমত প্রকাশ করা হয়েছে, রোহিঙ্গা গণহত্যা বন্ধে বিদেশে জনমত তৈরি করে বাংলাদেশকে নৈতিক অবস্থান নিতে হবে।

#

ফাহিমা/মরজিনা/সাইদা/রশীদ/তানিয়া/২০১৭/৯.০০ ঘণ্টা

